

ACCUSSI' CUMINCIÀÌ E NA FINII CCHJU'

(Finale giugno 2021)

M'arriuordu n'fattu ca mi vinni n testa
quannu a musica ri notti ma sunnava.
Iu era ancora na rappa ri racina ngresta
ma a musica mi scutìa e mi chiamava.

Na sira, sintii n'suonu forti e chiaru
e iu arrizzài l'auricchi pi sintìri.
Jatti, surgi e acieddì s'ammucciàru
e i cani a finìuru r'abbaiàri.

Era u sonu ruci ri na sirinata
sutta u luştṛu chi mannava a luna.
Vulìa scappari dḍà, sutta n'arcata
ma me maṛṛi mi stampàu dḍu scuppuluna.

Dḍa scossa ca ruràu corchi annu
nu-mmi sfasciàu, anzi, mi cunzàu.
U cori si nfrinzàu ri noti, senza dannu
fui comu n'allarmi forti chi sunàu

Rìcica, puru a notti iu friscava
i canzuni chi sunavanu nna zzita.
Dḍu strummientu luciusu chi sunava,
me paṛṛi mu rialàu, e mi retti a vita.

Smuncji u mantici e i tasti cuminciàì a tuccari
sunannu valzeri, mazzurchi, porche e u cucù.
Puru u cani, ru prieu, si mittìu abbaiani,
accussì cuminciàì a sunàri...e na finii cchjù.

Lucio Vranca